


Erënnerungen un de Grand-Duc Jean





An der Kierchefënster vun der Colmer Kierch op der lénker Säit vum Chouer vis-à-vis vun der Loge gesäit een am zweete Véierel iwwert der Kroun de Grand-Duc Jean als klenge Jong an am ënneschte Véierel d'Schlass vu Colmer-Bierg





Eise Buergermeeschter **Christian Miny** verbënnt vill flott Kandheets-erënnerunge mam Grand-Duc Jean.

„Hien ass oft beim Biisserbësch mat de Muppe spadséiere gaangen an ass Champignone plécke gaangen. Hie war ëmmer u senger Bëscher an un der Juegd intresséiert an huet och mol kritesch hannerfrot, firwat dann elo deen een oder anere Bam huet misse gehae ginn. Wann hie Leit aus dem Duerf begéint huet, ass hien ëmmer stoe bliwwen an huet e puer Wuert mat hinne gepotert. Hie war en immens oppene Mënsch, dee sech trotz senger Souveränitéit fir seng Matbierger intresséiert huet, an him war et wichteg ze wëssen, wéi et de Leit dobausse geet. Mat him ass net nëmmen e grouse Statsmann, mee och ee fir déi Colmer Leit beléifte, joviale Matbierger vun eis gaangen.“



De fréiere Buergermeeschter **Gast Jacobs** erënnert sech un en aussergewéinlech léiwen a joviale Mënsch.

„Wann een de Grand-Duc Jean gesinn huet, bei de Scouten, beim Hämelmarsch mat der Musek, wa mir als Kanner liichten oder klibbere gaange sinn, oder soss mol, dann ass een engem aussergewéinlech léiwen a joviale Mënsch begéint.

Perséinlech erënnere ech mech un een Evenement vu Mëtt den 90er Joren, wou mir Séisswaasserjelliskäpp am Weier vum Gemeengepark haten. Stonnelaang war deemools de Grand-Duc Jean präsent. Hien huet déi Déiere fotograféiert an huet Leit matbruecht, fir hinnen se ze weisen. E puer Mol si mir eis do iwwert de Wee gelaf an eng Kéier sot de Grand-Duc mat Schmunzelen: ‚E puer hätten der awer och bei mech an de Weier gepasst.‘

Op der Sich no Champignone si mir eis e puer Mol am Biisserbësch begéint. Eemol war ech mat menger ganzer Famill do an de Grand-Duc mat der Grande-Duchesse. Mir haten ee Prachtexemplar vun engem Steepilz fonnt an eent vu menge Kanner huet den Altessen de Pilz ginn. Si hunn e gekuckt an d’Grande-Duchesse sot: ‚Ass dee fir ons?‘ De Grand-Duc huet de Pilz och nach gekuckt an hien huet de Kanner en erëm zrëckginn. Déi Woch duerno sinn ech e Kuerf Steepilze plécke gaangen an hunn se um Schloss ofginn. Ech krut ee ganz léiwe Merci zrëck an si hätte gutt geschmaacht.

Den 23. Mäerz 2002 hat d’Gemeng Colmer-Bierg eng Fête d’Adieu fir déi groussherzoglech Koppel organiséiert, éier si an d’Schlass Fëschbech wunne gaangen ass. Wéi si um Schluss vun der Feier virun dem Kulturzenter an d’Limousine geklomme sinn, sinn eisem Grand-Duc e puer déck Tréinen d’Baken erofgelaf.

Wéi de Grand-Duc Jean den 28. Abrëll 2019 déi leschte Kéier aus dem Schloss eraus duerch d’Käschtenallee an d’Stad gefouert gouf, war ganz Colmer-Bierg op de Been, an esou munch engem vun eis sinn och déck Tréinen d’Baken erofgelaf.“



Den **Arthur Arendt** erënnert sech un en Depannage vum Grand-Duc sengem Range Rover duerch säi Papp.

„Eise Grand-Duc Jean war e groussen Naturfrënd an hat vill Freed mat senger Juegd. Wann d’Leit vun der Geessemillen de grénge Range Rover gesinn hunn an d’Schwarzbaach abéien, da wousste se, datt de Grand-Duc en Tour duerch seng Bëscher maache géif, fir bei de Weieren no den Inten ze kucken an d’Wëld z’observéieren. Enn 1985 ass him dunn awer e Mëssgeschéck geschitt. Hien hat am Lellerbësch eng naass Plaz iwwersinn an ass mat sengem Jeep am naasse Leembuedem stieche bliwwen. Well et onméiglech war, eleng erauszekommen, huet hie säi Bäifuerer op de Lellerhaff geschéckt, fir no Hëllef ze froen. Mäi Papp war zoufälleg doheem an huet sech gläich mam Trakter op de Wee an de Bësch gemaach. Den Depannage ass gutt verlaf a wéi si dunn erëm op festem Wee waren, huet de Grand-Duc de Wonsch ausgedréckt, dat Ganzt am Bild festzehalen.“

No e puer Wochen hu mir vun der Cour Grand-Ducale schrëftlech Merci gesot kritt mat dëser Foto, ënnerschriwwen „Jean, October 1985’.“



De fréiere Buergermeeschter **Erny Thill** huet ganz positiv Erënnerungen un de Grand-Duc Jean, waren si dach gutt Frënn, besonnesch wärend där Zäit, wou hien d’Geschécker vun eiser Gemeng geleet huet (1979-1993). Fir den Erny Thill bleift de verstuerwene Grand-Duc als e ganz behëllefleche Souverain a gudder Erënnerung.

„De Grand-Duc Jean war e ganz joviale Mënsch, deen ëmmer gutt gelaunt war an sech fir alles intresséiert huet, et konnt een sech op de Mann verloossen. Wéi deemools den Tour de France zu Colmer-Bierg passéiert ass, hat de Grand-Duc mech ugeruff a sot: ‚Mir zwee fueren elo den Tour de France kucken, an du sees kengem, wou mer sinn, dat geet keen eppes un, mir wëlle roueg sinn.‘ Dat hat alles gutt geklappt, mee op der Gendarmerie war dee Mëtteg vill Opreegung, well si haten de Grand-Duc verluer an et hat keen eng Ahnung, wou hie wier ...“

... an da loosse mer zu gudder Lescht och nach eise fréiere Wiert an direkte Noper vum Grand-Duc, den **Här Josy Theves**, zu Wuert kommen, wéi e gesot sollt hunn:

„Wann ech déi Säit der Mauer op d’Welt komm wier, anstatt hei am Haus, da wier ech haut de Chef vum Ganzen.“



an der Mëtt den Thevese Josy emruemt vum Tist a sengem Pärdd Louis



Photos :
LA MAISON GRAND-DUCALE DE LUXEMBOURG 1939
Éditeur : Joseph OLINGER, Diekirch



Erënnerungen un de Grand-Duc Jean



1980: Konveniat um Schlass vun de Joergäng 1918-25



2007: 50 Joer Goodyear Photo-Ciné Club, Colmar-Berg
Jean-Louis List, Grand-Duc Jean

Besuch op der Goodyear



1987: Bei der Chorale Ste-Cécile



Op Besuch am Centre de formation pour jeunes conducteurs



Fotoen: Archives GYPCC, CB



1989: 150 Joer Lëtzebuerg
v.l.n.r. Carlo Knoch, Mme Thill,
Erny Thill, Grand-Duc Jean,
Grande-Duchesse Josephine Charlotte



1992: D'Harmonie Grand-Ducale
Orania feiert 120 Joer an en neie
Fändel



1999: Aweigung vum Scoutshome
Norbert Heck, ?, Paschtouer Jos Reuter,
virun him PJ Roch, hannert hinnen
Ady Jung, Burgermeeschter Fernand
Diederich, Minister Alex Bodry,
Grand-Duc Jean, Pierrot Matagne,
Commissaire générale vun der FNEL,
Elisabeth Scheier, Nancy Holtgen

Fotoen: Archives GYPCC, CB



Erënnerungen un de Grand-Duc Jean

